

MILLE MA ILMAN INÄMB LINDORA LAATU EI LÄÄQ

Vaaba Janek

kaeq, ostja!
kõnõlõs hääd võru kiilt
säänest, midä vasta setu piiri kõnõldas
ei tiiaq, mille tõõsõq müüjäq täst vallalõ tahtvaq saiaq
kõnõlõs ilusat võru kiilt

ütel' et ma näütä 35 vällä
no mis sa arvat, et sa tuu jutugaq edimäne olõt
ütel' et noorõst pääst
sikut' tä üte käega pia sada killu maast vallalõ
et ma piät kah trenni tegemä
no mis sa arvat, et sa tuu jutuga edimäne olõt
tiid, kuimuudu Obinitsan kõnõldi
naard' ja üteli' jõbima
midä sääli sis nii väega naardaq om
üteli' et ku mu naanõ om kaljukits
sis lätväq meil asjaq vussi
mille taa kandi rahvas tuud horoskopismust usus
a no olkõq, kõnõlõs jo ilusat kiilt

kitt' et määnegi Talña nuurmiis käübev
tä poolõ süsteeme paika pandma
näüdäs vanast telehvonist tuu poisi pilti kah
et kas maq ka taha süsteeme paika pandaq
mis kuradi süsteeme
hää et ma umma nimme tälle es ütleq
ega es lupa q tälle küllä minnä
muidu järgmäne aastak näütäs järgmädsele muq pilti

kunagi ollimi naasõga Võrumaal pidun

sääl kõnõl' kah üts miis,
et süsteem om miig vasta
ja selet' kuimuudu timä süsteemi läbi näge
määnest infot täl järgmäisi tõpi kotsalõ om
midä süsteem miig häötämises tennüq om
naasõga kutsumiq tuud miist õks viil Süsteemimehes
mis kuradi süsteemiq siin kõigil ommaq

seol siin om suun üts kõvvõr hammas
silmi iin kantligadsõq prilliq
är ka ei lääq
a piät ütlemä, et kõnõlõs ilusat võru kiilt

joba mitmõndat vuuri pakk tä vällä
muu jutu siän
et ma timä manuq süsteeme tulnuq paika pandma
hoiat' et ilman om egäsugutsit haigit inemiisi
et oldas esikinä piniga ja
ma edesi es viisiki kullõldaq
olkõq et ilusat võru kiilt kõnõl'